



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 3

Yangia anidakangma :

f Tir Yimym

Instagram tiryimym@aolima

YouTube tir yimym

TAPAK 8

BJP Ienir Bhajan Lal Sharma-i Rajasthan Chief Minister tenanzükba agi

Li Ning North East Invitational Badminton Tournament 2023 tembangogo



VOL. XXI NO. 69 (ADOK 69) DIMAPUR

KÜPTOKNÜ (SATURDAY)

LUCHII (DECEMBER) 16, 2023

₹ 5.00

Khristmas matongdang scholarships agüjang: ANCSU

Dimapur, December 15, 2023 (TYO): All Nagaland College Students' Union (ANCSU)-i Centrally Sponsored Scheme – Post Matric Scholarship (CSS-PMS) indang tanabuba installment meshiogo.

State sorkar aser bangdak minister-i December 13, 2023 nü 2022-2023 atema arrears Rs 26.25 crore aser 2023-2024 atema mezüngbuba installment agütsüba atema pelar saka kaketshirtemi scholarship nüngdakba ya department aser

bangdakpurtemi angatettsüla ta ANCSU-i ashi.

Anungji department-i tatemtsü shia aser mapang menutsü mapa meinyaki kaketshirtem indang scholarship agütsütsü akhanger ta ANCSU-isa ashi.

December 22, 2023 matongdangsa CSS-PMS ST 2022-2023 indang tanabuba installment agütsütsüla aser iba mapang tsüngda magütsüra onoki ozüngi melaba ama lungkak aitba mapa tenzüksü, ta parnokisa ashi.

Parliament telungi aitertemi mepetmesü adokdaksütsü tasa atong

New Delhi, December 15, 2023 (Agencies): Parliament security alema inyaksangshirtem Lalit Jha, Sagar Sharma, Manoranjan D, Neelam Azad aser Amol Shinde nungeri linük nung mepetmesü adokdaksütsü tebilemba liasü ta police-i ashi.

West Bengal nung tesayur inyaker Lalit Jha apuba sülen police-i ita aika tejangdang nungi Parliament nung ozüng alema inyakba tasa atongba bushitetogo.

Hokolbarnü Delhi Police-i Lalit Jha okadaki anir aodang 'parnok aiben ajuruteper aser parnok indang sentongji linük nung mepetmesü adokdaksütsüba liasü' ta police-i ashi.

Parliament nung apurtem Sagar, Manoranjan, Neelam aser Amol nunger UAPA kübok tai tonglokja lir. Okadaki Lalit Jha anogo tenetnü police ket nung

ayutsü temelaba agütsüogo.

Sorkari onok takhangba agizükdaksütsü atema onoki linük nung mepetmesü adokdaksütsü bilem ta Lalit Jha-i police tsüngdang nangzük.

"Pai tai tonglokja alir ajak indang phone miima ayu aser kulitem samatsü atema raksaa endok. Pa Delhi nungi Jaipur-i aodang pa indang phone raksaa endokba shiogo" ta Delhi Police-i ashi.

Iba tasa ya Lalit Jha-i atong. Pa dang asüngdangya asüdang parnok ya telok mesüra bendang linük kar den tesentaktep ali asü mali'ar metettsü ta police-isa ashi.

"Onoki parnok kati ka ajurutepdaksütsü, mobile phone tem bushitsü aser parnok anogo 4 nü amongba hotel bushitsü. Iba maparen nung senotsü amshiba tsüngsü bushitsü" ta parnokisa ashi.

Mon-Namtola tsüngda apu raksa

Dimapur, December 15, 2023 (TYO): Hokolbarnep Mon district nung Mon-Namtola apu chirepba ajanga district ketdangsürtemi gari tulutem senzüba noktangogo.

Mon Deputy Commissioner Ajit Kumar Verma IAS-i sangdong ka nung Namtola,

Charaideo, Assam aser Mon, Nagaland tsüngda gari tulu mesenzütsü metetdaksüogo.

Maneni, Mon-Namtola apu meyanglu tashi gari tilatem aser passenger gari ajak Namtola Charali (Assam) - Lahdoigarh - Jaboka - Pentom Junction (Tizit/Mon) leni senzütsü metetdaksüogo.

Martyr's Cemetery nung mang 19 remogo

Imphal, December 15, 2023 (Agencies): Kuki-Zo nunger tasümgang 60 nungi 19 tashi lokti asüpila sentep sentong ka agir remogo.

Hokolbarnü lisopur telok kati Kangpokpi district ajanga mokdang lia tasümgang ajak Phaijang village nung aliba Martyr's cemetery nung arem.

Manipur nung Kangpokpi district ya Kuki-Zo nunger teimba ser aliba district ka lir.

Tanüngba tasümgang 41 ji yashi Imphal nungi Churachandpur district headquarters-i tayimtsü ajanga bener ogo aser Churachandpur Medical College morgue nung yua aliba tasümgang 24 den külemi taruba hopta Khuga Tampak

nung aremstü akok.

Tanü agiba sentong ya Committee on Tribal Unity, Sadar Hills aser Kangpokpi nung Kuki nunger telok kati külemi ayongzükba agi.

Tanü ghonda 12 mokdangba ajanga Kangpokpi district nung dokan, shishilembadak, shisaliok rejutem aser office ajak shibanga liasü aser asüpila sentong nung lisopur aika aden.

"Onoki Martyr's Cemetery nung Kuki-Zo nunger tasürtem nem tetushi tulu agüja aremer" ta CoTU-i metetdaksü.

Brihostibarnü sorkar ketdangsürtemi Meitei nunger 4 densema tasümgang 64 tashi pei kinunger ket nung agüja liasü.

Governor Ganesan-i Yuva Utsav Nagaland tenzüksü



December 15, 2023 nü IG Stadium nung State Level Yuva Utsav agidang Governor La Ganesan den külemi YR & S ketdangsürtem aser district balala nungi shilem agirtem agiba noksa angur.

Dimapur, December 15, 2023 (TYO): Nagaland Governor La Ganesan-i December 15, 2023 nü State Level Yuva Utsav Nagaland tenzüksüogo.

Iba sentong ya Department of Youth Resources & Sports aser Nehru Yuva Kendra Sangathan külemi yaritepa ayongzük.

Iba sentong nung Governor ka ama dang masü saka Nagaland nung sobaliba tajung nukshir ka ama adener ta Ganesan-i ashi.

Utsav ajanga 'Panch Pran' benjunger aser iba tezüngzüktep pungu ajanga asen linük 2047 küm tashi nung developed nation ka akümtsü len anir, ta pai ashi.

"Asenoki India renloktsü

alizüng atongtsüla, yimsüsüba kübok aliba tangatetba agientsüla, asen sobaliba aser senmang atema nüma atangtsüla, telongjem adokdaksütsü bangjemtsüla aser senso ka teinyaktsü inyaktsüla" ta Governor Ganesan-isa ashi.

Iba tangatetba nung Yuva Utsav 2023 aser Viksit Bharat@2047:Voice of Youth sentongtem agir ta paisa shisem.

Iba sentong nung tetoktepba balala ya asenok külem taginübatem lir aser asenoki 'Panch Pran' nung azüitdang 2047 tashi nung India renloktsü agizükdi ta Governor-i ashi.

La Ganesan-isa shilem agir

ajak dang pei tajungtiba agütsütsü aser India renlokba nung shilem agitsü ayongzük.

Paisa tesentepertem ajak dang linük senmang ateam nüma atangtsü aser teti linük tenüng aser akhüm küzmüka ayutsü ayongzük.

Sentong nung Accounts & Program Assistant, NYKS Ruokuovikho Chale-i Yuva Utsav indang osang lemsatop.

Tesüba mapang Youth Resources & Sports kübok district 13 nung district level sentongtem agiogo aser state level competition nung takokertemi Nagaland tenüng nung shilem agitsü ta Ruokuovikho-i ashi.

Asür Temjen Toy indang taküm otsü kaketsayaogo



December 15, 2023 nü Nagaland Chief Secretary J. Alam, IAS (achiji)-i asür Temjen Toy indang taküm otsü kaketsayaogo agiba noksa angur.

Kohima, December 15, 2023 (DIPR): December 15, 2023 nü Nagaland Chief Secretary J. Alam, IAS-i asür Temjen Toy indang taküm otsü kaketsayaogo.

Nagaland nung taoba Chief Secretary asür Temjen Toy indang kaketsayaogo "Not Just Another Bureaucrat: Temjen Toy As I Knew Him" ya IPR nung taoba Director Limawati Longchar-i züluba lir.

"Iba kaketsayaogo Temjen Toy taküm tushir. Iba kaketsayaogo ya tejashi mapangtem masü saka Temjen taküm nung ajangshibatem aser tajung tatalokbatem indang zülü" ta Limawati-i ashi.

"Temjen Toy ya kanga junga taküm litetba nisung ka aser state nung temelenshi aika bener arur ka ta medemertem aser kinungertem teti bilemettsü ayongzük" ta paisa ashi.

Temjen Toy meimertem aser

medemertem aser talisa Menukhol John o Elias Lotha nungeri kaketsayaogo züluba piyong teyari agütsüba atema pelar ta Limawati-isa ashi.

"Temjen Toy kanga dang ajungbena asüba atema temulung shiranger aser iba kaketsayaogo pa indang senmang kuli agütsür" ta Chief Secretary J. Alam, IAS-i ashi.

"Temjen Toy-i pa den külemi inyaksemeritem den ketdangsür ka ama masü saka medemer ama inyaksangshi. Iba kaketsayaogo ajanga Temjen Toy taküm tejangja sayur" ta Alam-i ashi.

Iba sentong nung IPR Director Asangla Imsong menden liasü aser Temjen Toy'er medemertem, kinungertem aser temeimeritem den DIPR ketdangsürtem aden.

Iba kaketsayaogo Made in Nagaland Centre, New Capital Complex, Kohima; Students Book Centre, P. R. Hill, Kohima; Modern Book Depot, Church Road, Dimapur; Associate Pastor Women, Mokokchung Town Baptist Church aser Amazon nung alitsü akok.

Mangkolemba nung Vikshit Bharat Sankalp Yatra agi

Dimapur, Luchii/December 15 (TYO): Customary Court Mangkolemba nung December 14, 2023 nü Vikshit Bharat Sankalp Yatra sentong agia liasü. Iba sentong nung tesemdanger tongti ama Additional Deputy Commissioner Mangkolemba, Lankonsen Tsanglao dena liasü. ADC ajanga jembidang, Vikshit Bharat Sankalp Yatra ya linük tesem ajungalen sorkar indang sentong balala takok

ngua inyaksü aser scheme balala nungi teyari temsüa alir nem agütsütsü nükjidong nung tenzük ta ashi. Paisa nüburtem dang iba osang sangdongtsü/prokshitsü ajungshi aser temsüa alirtem dang lenmang sayutsü ayongzük. Iba sentong nung Manager SBI Mangkolemba; Chairman, All Wards Chairman, Mangkolemba, Lanuyanger aser ADC office, Mangkolemba

nungi Rongsennukshi nungeri Meri Kahani Meri Zubani, PM SVANidhi, PMAY aser AYUSHMAN indang presentation agüja liasü. Ato Kilonseri jembiba o angadaksüba den külemi Registration of Ayushman Bharat, Biometric authentication aser Aadhaar update asüba nunger yangji agia liasü. Iba sentong ya SDO (C) Mangkolemba, Hotolu Sema lenisüba kübok agia liasü.



Mon-Namtola apu kanga mejungi raksaba mechi Deputy Commissioner, Mon, Ajit Kumar Verma, IAS ajanga Assam kübok Namtola, Charaideo aser Nagaland kübok Mon tsüngta Heavy Vehicles sezüba ajunga khen asoshi anena atatsü metetdaksüogo. Kasa lenmang nung senzüba light, medium aser passenger garitem Charali (Assam) - Lahdoigarh - Jaboka - Pentom Junction (Tizit/Mon) lenmang nung jaja alitsü ashi.

Peren nung DRDA office tasenba semzükogo



Peren nung December 15, 2023 nü DRDA Office tasenba semzüksüngdang tangokba noksa ka nung Minister Metsubo Jamir aser Deputy Commissioner, Peren aser ketdangsürtem angur.

Dimapur, Luchii/December 15 (TYO): Minister, Rural Development, Government of Nagaland, Metsubo Jamir-i December 15, 2023 nü New District Head Quarter Peren nung District Rural Development Agency (DRDA) Office Peren semzükja liasü. Pai iba office semzüksüba

mapang, District Office tasen agütsüba asoshi Tsüngrem nem tenüngsang agüja liasü. State nung department tulutibaji Rural Development Department ya lir aser yangi metokmeperi kar alitsü akok, saka kati ka den angatettepa district aser nübur ajanzüksü asoshi inyaksüla, ta pai ashi.

Minister Metsubo-isa entrepreneurs aser sentong nung adener dang pei libaliru yimya temaba jenzangi ajungketsü ajungshia liasü. Iba sentong ya BDO Tening lenisüba kübok agi, aser C. Khangyang Imlong, Project Director DRDA Peren ajanga tarur pela agizükba o jembia liasü.

Sakraba yimdak 49th Cultural Day cum general session agi



Dimapur, Luchii/December 15 (TYO): Sakraba Youth Organisation indang 49th General session pre-Golden Jubilee celebration-cum-Cultural Day sentong Phek district kübok Thürinyi Küde, Sakraba village nung December 15, 2023 nü agia liasü. Iba sentong ya 'Envisioning a promising future' omen nung ajemdaker Basa 'B' Khel ajanga ayongzükja liasü. Iba sentong lapoktsür ama Chakhesang Wrestling Association tir Vekhozo Ringa aden aser pai yimya tajung mesamadaksüi amshitsü aser lanurtem nem angazükdaksütsü ayongzükja liasü. Pai taintem dang sobaliba maitsü sübosolemtsü indang lanurtem nem angazükdaksütsü ajungshi.

Saisapong indang jembidang, asayar ajakbo saisapong agi pei poksünga melitetsü, ajisüaka parnok ajungshitsüla, ta ashi. Olympic Games amala sentong tulu nung shilem agitsü nükjidong nung Naga wrestling den külemi judo, taekwondo aser wushu amala asaya nung temolung agütsütsüla, kechiaser state nung Naga wrestling asoshi nükla kanga ajema lir, ta Ringa-i ashi. Paisa aruya aliba Chakhesang Wrestling Meet ya February 9, 2024 nü tenzüksü aser Chozuba Area Wrestling Association ajanga ayongzüksü, ta sangdong. Sentong nung Sechekhu Wrestling Association tir Kühüsheyi D Vadeo-ia wrestler tem dang pei wadang nung takok angutsü asoshi yimya

tajung amshitsü ajungshia liasü. Paisa aruya aliba Secheku Area Wrestling Meet ya January 12, 2024 nü Porba village nung alitsü ta sangdong. CWA tir Ringa-i Sakraba Youth Organisation indang nisan salatsü aser Huluyi D Vadeo-i asayamung indang milen tsükloksü. Iba anogo nung sobaliba yimya balala den nisung anati ken atenba, yodeling, wrestling aser akhi yimya nung mi apoba amala tetoktepba liasü. Wrestling match nung Huluyi D Vadeo-i yimtsung nung Best Naga Wrestler titel tanaben soita ayu. Pai final nung Huravo Vadeo madak takok ngua liasü. Ruvezo D Vadeo aser Mhathoveyi D Vadeo nati tanabuba aser tasembuba jenzang angu. Junior wrestling category nung Shekuzo Vadeo-i mezüng jenzang angu, Mulive Lohe-i tanabuba jenzang, Ozo D Vadeo aser Shenieto D Vadeo nati tasembuba aser pezübuba jenzang nguteta liasü. Kasa anogo CWA ketdangsür temi Sakraba nung aliba Wazholu semdanga liasü, kong mezüngbuba Chakhesang Wrestling Championship alitsü.

Sazolie College nung DMFT mezüngbuba batch graduate süogo

Kohima, Luchii/December 15 (TYO): Kohima nung aliba Sazolie College alizüng ka tongteta ita trok Digital Marketing Fast Track (DMFT) course agiba batch mezüngpur nem tenüngsang agütsüba sentong ka December 15, 2023 nü agia liasü. Sazolie College indang principal Dr. Gopal Chetri lenisüba kübok iba sentong ya agia graduates tem takum melenshiba lenmang ka tatemi arua liasü. Dr. Chetri-i kaketshir dang digital putu indang rateta ashi aser graduate asüba kaketshirtem dang course tasenba indang ambassador kaka akumtsü ajungshia liasü. Co-Founder, Modern Myriad Branding (MMB) aser Consultant, Investment & Development Authority of Nagaland (IDAN), Namang T

Chang-i iba sentong nükjidong indang lemsatepdang, IDAN den lungjemer DMFT Course asangsang nung sayuba indang ashi. Pai kaketshirtem dang industry yimya tem meteta alitsü ajungshia liasü. Iba sentong ya ajanga college-i shisaliok tsütsü lenla balala agütsüba aser fast track students asoshi "Certificate course in Digital Marketing" agütsüba aser maneni azünger asoshi "Diploma course in Digital Marketing" agütsüba sayur. DMFT graduate tem rongnungi Tianungsang Longkumer-i jembidang college dang pelaba lemsatep aser iba course agidang parnoki shisatsü angazükba lemsatepa liasü. Sazolie College nung DMFT atema ano January 2024 nungi tenzükja registration agitsü.



Tanü Maple Tree School, Dimapur nung küm tatem benjungmung sentong aliba mapang kaketshirtemi ' Oliver Twist ' indang jilushi aiba angur. (Dimapur, December 15, 2023).



December 15, 2023 nü New Delhi nung Parliament kima Lok Sabha nungi anentsüba MP tem- Manickam Tagore, V.K. Sreekandan, T.N. Prathapan, Kanimozhi Karunanidhi, Hibi Eden, Jothimani aser Ramya Haridas nungeri longkak aيتدang tangokba noksa nung angur.

BJP lenir Bhajan Lal Sharma-i Rajasthan Chief Minister tenangzükba agi

Jaipur, Luchii/December 15 (Agencies): Hokolbarnü BJP lenir, Bhajan Lal Sharma-i Rajasthan Chief Minister tenangzükba agiogo; BJP lenirtem ana-Diya Kumari aser Prem Chand Bairwa natia Deputy Chief Ministers tenangzükba agi.

Tenangzükba agiba sentong nungji Ato kilonser, Narendra Modi, Union Home Minister Amit Shah aser BJP National

Tir JP Nadda nunger densema tongti lenirtem aika aden.

November 25 nü Rajasthan nung agiba assembly elections nung BJP-i menden 199 nungi menden 115 tashi nung takok nguteta liasü.

Bharatpur district nungi Bhajan Lal Sharma-i Ato kilonser Narendra Modi lenisüba kübok party-i nendaka inyaksü aser Rajasthan nung nüburtem taginüba ataloktsüba

den külemi terenlok lenmanung nung anitsü, ta metetdaksü.

Tenangzükba agiba sentong nungjisa taoba mapang Rajasthan Chief Minister Vasundhara Raje, Defence Minister Rajnath Singh, taoba mapang CM aser Congress lenir Ashok Gehlot, Union Ministers- Arjun Ram Meghwal aser Gajendra Singh Shekhawat nunger densema liasü.

Patna Court Complex nung nisung anati tepuokdak alir ka khaset

Patna, December 15 (Agencies): Hokolbarnü Bihar yimtiba, Patna nung aliba court complex ka nung nisung anati tepuokdak alir ka khaset.

Police-i nisung anapronglaji puogo.

Abhishek Kumar anema nisung tepsetba ken o densema ken o aika benoka lir.

Patna West SP, Rajesh Kumar-i, tang ken o tangadak

aser tepuokdak alir, Abhishek Kumar (Chhote Sarkar ta ajasang) ji tanü Danapur court matsüngdangi anir aotsü liasü, ajisüaka ken o anga metenzükdang nisung anati pa khaset, ta metetdaksü.

"Pa Danapur court-i anir aoba mapang nisung anati pa khaset. Pa dak injang khaloktsürtemji pua police station-i anir ogo. Pa khasetba

kuli metettsü atema tena dang asüngdangyatsü," ta Rajesh Kumar-isa metetdaksü.

Iba tesem nungjagi injang terep pezü nguogo aser court complex nung tensa mejungi lir.

"Pa khasetertemji Muzaffarpur district nungi lir. Police-i injang terep pezü ngutetogo, ajisüaka injang kwi agi pa dak khashiar mejangja," ta Kumar-isa metetdaksü.



December 15, 2023 nü Ranchi nung Jharkhand state assembly asükwa mongpu senden mezüngnü Chief Minister Hemant Soren-i State Assembly Speaker, Rabindranath Mahato agizükdang tangokba noksa nung angur.

Odisha sorkari 2028 küm tashi Food Security Scheme atsülanger

Bhubaneswar, Luchii/December 15 (Agencies): Hokolbarnü Odisha state sorkari, State Food Security Scheme (SFSS) December 31, 2028 tashi küm pongu atsülanger, ta metetdaksü.

Chief Minister Naveen Patnaik-i iba temepishiba agizükogo.

SFSS scheme kübok ita shia nisung shia nemjang seret 5 angati agütsür aser iba scheme ya December 31, 2023 tashi benoka lir, saka ano maneni küm pongu atsülango.

CMO sangdong ka ajanga, taruba küm pongu tsüngda iba scheme atema state sorkar senpong nungi sen crore 1,250 indoktsü; küm shia sen crore 250 indoktsü, ta metetdaksü.

State Food Security

Scheme kübok state nung kibong 3,14,923 nungi nisung 9,97,055 nem ita shia jang seret pongungu (5) angati agüja arudar.

"Iba scheme ano küm pongu atsülanger, ta metetdaksü. Chief Minister Naveen Patnaik-i iba temepishiba agizükogo. SFSS scheme kübok ita shia nisung shia nemjang seret 5 angati agütsür aser iba scheme ya December 31, 2023 tashi benoka lir, saka ano maneni küm pongu atsülango. CMO sangdong ka ajanga, taruba küm pongu tsüngda iba scheme atema state sorkar senpong nungi sen crore 1,250 indoktsü; küm shia sen crore 250 indoktsü, ta metetdaksü. State Food Security

Chief minister-i ktdangsertem dang state nung sensaker ajak nem chiyungtsü security agütsüsüla, shinga mesendoktsüla, ta tuyuogo.

NFSA scheme kübok state nung kibong aika sendokba ajanga state sorkari state sasep nung SFSS scheme ya tenzüka liasü, ta ktdangser kati metetdaksü.

Tetsür anema inyakba ken o teimtiba benokba yimtiji Delhi lir: NCRB

New Delhi, December 15 (Agencies): National Crime Records Bureau (NCRB)-i, linük nung tetsürtem anema inyakba ken otem teimba benokba yimtiji Delhi lir, ta metetdaksü.

2022 küm Delhi nung tetsürtem anema inyakba atema benokba ken o 14,247 liasü; Delhi nung 2020 küm item ama ken o 10,093 benoka liasü aser 2021 küm ken o 14,277 benoka liasü.

State tem sasep nung tetsürtem anema ken o teimtiba aliba state ji Uttar Pradesh lir (ken o 65,743); iba sülen Maharashtra (45,331), Rajasthan (45,058), West Bengal (34,738) aser Madhya Pradesh (32,765) state tem lir.

National Crime Records

Bureau data ajanga ashiba agi, 2022 küm India nung tetsürtem anema inyakba ken o ajak senteper 4,45,256 liasü, aser ibaji ghonda shia ken o 51 benokba den kasa lir.

Tetsürtem anema inyakba ken o teimtibaji kinüngbu mesüra kinüngertemi tetsürtem anema inyakba ken otem (shilem 31.4) liasü; iba sülen tetsür puer aoba ken o (shilem 19.2), tetsür dak azükba ken o (shilem 18.7) aser tashiyim amshia tetsür raksatsüba ken otem (shilem 7.1) liasü.

Item ya police matsüngdang benokba ken otem dang lir, ajisüaka police dang report masüba tatalokbatema aika alitsü, ta kasa report ajanga metetdaksü.

DIMAPUR BRANCH
Nyamo Lotha Road (Church Road)
Dimapur - 797112, Nagaland,
Email: dimapu@bankofbaroda.com

[Rule 8(1)] KIOJEN AGIBA NOTICE (For Immovable Property)

Securitisation and Reconstruction of Financial Assets and Enforcement of Security Interest (Second) Act, 2002 aser Security Interest (Enforcement) Rules, 2002 kübok Section 13(12) aser **Rule 3** nung agüja aliba tashi amshia **Bank of Baroda, Dimapur Branch, Dimapur** nung Authorized Officer-i **11.07.2023** anogo nung Demand Notice ka ajanga sen apur **Mr. Zhimoka Zhimomi (sen apur), Mr. Kaka Zhimomi (Guarantor/Mortgagor), Mr. Pekiye Achumi (Guarantor)** dang notice anguba sülen anogo 60 tsüngda notice nung shia aliba ama **sen 3,44,43,379.32p (Rupees Three Crores Forty Four Lakhs Forty Three Thousand Three Hundred Seventy Nine and Thirty Two Paise Only)** agüjang ta tuyua liasü.

Sen apuri senji magütsütet nung sen apur aser public dang iba ya sangdonger, tsünglanglen sign süa aliri iba Act nung **Sub section (4) of Section 13 aser Security Interest (Enforcement) Rules, 2002 nung Rule 8** ajanga pa/la nem agüja aliba tashi amshia tsünglanglen shia aliba kiojen **2023 küm December 14** anogo nung agiadokogo.

Talisa sen apur aser public dang iba kiojen dak sendakba kecha inyangsangshi masütsü tekümdangtsü metetdaksür, mesüra Bank of Baroda nem **sen 3,44,43,379.32p (Rupees Three Crores Forty Four Lakhs Forty Three Thousand Three Hundred Seventy Nine and Thirty Two Paise Only)** den sen tetemlok agütsüsüsa akümtsü.

Sen apur dang sub-section (8) of Section 13 nung ajemdaker mapang shidak nung iba kiojen alangzüksü metetdaksür.

Kiojen osang tejangja:

Lane 1, Eralibill (Ekranipathar) Village, Mouza- 3, Block No. Ekranipathar AK, East Police Station, Dist.- Dimapur, Nagaland nung aliba House No. 84 nung Dag No. 120/890, Patta No. 724 nung aliba kiojen aser ali tasazük 14B-03K-04Ls nung aliba ajak

Bounded by:-
North tsütsülen: Lt. Shikaho, **South tsütsülen:** Er. Ghokuto,
East tsütsülen: Tohuli, **West tsütsülen:** Eralibill NCR Church.
Date: 14.12.2023 **Authorised Officer**
Place: Dimapur **(Bank of Baroda, Dimapur Branch)**

State Bank of India STRESSED ASSET RECOVERY BRANCH, JORHAT ADDRESS:- NA-ALI, M.G. ROAD, JORHAT, OPP. ASEB BUILDING, PIN : 785001 (ASSAM)

Yangi notice ka yamai agütsür, sen apur/tem M/s Printing Solution, Proprietor Shri Inaka Awomi, Lions Club Building, Nepali Gaon, Midland, PWD Road, Dimapur, Nagaland, Pin: 797112 (sen apur)-i Bank dang nungi loan agiba sen-dong aser sen tetemlok magütsütetba agi loans ji Non-Performing Assets (NPA) ta züngshir. Securitization and Re-construction of Financial Assets and Enforcement of Security Interest Act 2002 nung Section 13(2) kübok parnok nem tesütüba addresses nung notice agütsü, saka notice ji mengui meyipa aru, ibayongji public notice ajanga parnok dang ya sangdonger.

Sr. No	Name of Borrower	Details of Properties/Address of secured Assets to be enforced	Date of Notice	Date of NPA	Amount Outstanding
1	M/s Printing Solution, Proprietor Shri Inaka Awomi	All that part and parcel of land and building covered by Patta No. 551, Mouza No. 03, Dag No. 4/846, Block - at Naharbari, measuring 00B - 01K - 00LS in the name of Shri Inaka Awomi S/o Vihoshe Awomi vide Sale deed No. 387/14 dated 24.03.2014. On the North: NH-29, On the South: Muslim graveyard, On the East: Sema's Land, West: Approach Road.	04.11.2023	31.01.2016	Rs. 96,86,912.54 (as on 04.11.2023)

Substituted notice atema item mera agütsüsa aküm. Temalen shia aliba sen apur dang iba notice agütsüba anogo nungi tenzüka anogo 60 tsüngda sentsüh ajak agüjang ta tuyur, mesüra iba notice agütsüba sülen anogo 60 tembangba sülenbo Securitization and Reconstruction of Financial Assets and Enforcement of Security interest Act, 2002 nung Section 13 kübok sub-section (4) nung ajemdaker maneni mera agia inyaksü.

Sen apur dang iba Act nung Section 13 kübok Sub-section (8) nung ajemdaker mapang shidak nung item kiojen alangzüksü metetdaksür.
Anogo: 14.12.2023
Tesem: Jorhat
Authorized Officer
State Bank of India



TIR YIMYIM YIMOBILEM (EDITORIAL)

DIMAPUR

KÜPTOKNÜ

LUCHII 16, 2023

Asenok ya kechisa repranger-a na ?

Nagaland nung Mon district kümer küm tenem ajungba benjongmung amungtsü anogo asem nü lia tanga district-tem nungi Mon town leni aoba tongti lenmang Mon aser Namtola na tsüingda gari toudak nung apu chirepa gari tsüokbaji asenok ajak asoshi süoki ia bilemdangtsüba tatalokba ka asütsü. Kena tia junga iba lendong nung asü-amaba lendongbo mali asü saka alima tsüingdangbo asenok ajak asü amai bilemer. Nagaland nung tang amaisa yimten yimsüsüba aser ketdangtsüba mapatem memelenshi aser memetongshii yamaisa maneni ao nungbo, Mon-Namtola apuji dang masü saka Nagaland nung tanga aputema ka khen, ka khen ta chireptsüsa tia nung lir. Idangjibo asenok kar helicopter nung aser kar tetsüing agi pei kolak nung pei khu bener jajatsü. Item tatalokba angudang aser ajurudang, asenok nübortema aser yimsüsürtema kechisa repanga-a amonger-a na (?) ta bilemer. Horn bill benjong aliba agi Kohima tera merüka angur dang ashi, Nagaland nung shishilemdak yimti tulutiba Dimapur yimti tiyong lenmanga tangar dang sayutsülabo masü tarok-tapa, auyi aser lishi agi sünger benjong amongtsü aritepdagi. Ashiko, tang amaisa asenok ya asen kibong aser kilong asoshi dang bilema government mapa inyakra, memenui Dimapur nunga apu chirepa lendong tulu atalokba indang angashitsüa akok. Tia mejungra iba ama lendong nungji asenoka densemtsü. Aji dang masü saka Tuensang lenmangi odangra kasa lendong ajurutsübaji ana nung lir. Government inyakyim nung department-a Nagaland nungsa teimba amai lemsaa lir, saka department dang ashi, Nagaland tajungba küma renlokda tsüba department-bo mangur. Ashiko, department aika küma lemsabaji mapa tilala küma lemsar jungjunga inyaksü nükjidong nung masü saka tokolak aika akümstsü tebilemba nung akümba asütsüa akok. Aji oda, mapa inyaka manguyonga tokolak aika asübashiji government senpongbo taremba akümstsü. Ibaji Nagaland 'style' lir. Iba style nung lia asenok toudak nung apu chirepogo aser kenlirbo ita sen-a magütsütet state chireptsü. Tanga state, tangar assembly constituency aser tangar yimsüsürtem den asenok medemdangra asenok constituency ka yabo tangar kiyong tesa dang ka ta masü, onsara ilara aser nüboa ishira. Anungji, lenmanga aser apua tangar dang nungibo asen lenmang aser apua tajungba asütsüla. Mon ser tatsüka lurbo Assam aser yangjibo apu kilometer 10 jungnüa melamelaa temer nübortem anisüngzüka senzür. Aji oda, Assam nung tema aliba aputemji gari jajatsüba atema dang masü saka item apu jagi alima topur jungdaktsür. Item denji asen mapa aser jakla medemdanga bilemdang dang apu tilaka atemtsüa asenokibo makok temtur yutsür. Dimapur yimti tiyong nung lenmang lendi ajangdanga azüklen yin apu tila aser tatsüka küm aika nunga jungjunga merenemtet ajokshiba angur. Ibaji asen Nagaland yimya. Yamaisa asünungbo asenokbo state tasen ka akümba agia majungtsü. Asenok temulungjang, tangatetba aser aser jakla melenshitsu. Asen lima election agili, government kümli, MLA aser minister inyakli asen jajaba gari lenmang tamajungba-tamajungba kümli, apu chirepli, government office nung inyaker kata mali kümli, government mozü ki aser school ki anepalu mesütet tamajungba kümdaktsüli ta asüba ya, asenoka kechisa repranga küm tenem-rokerji süidaktsüar na ta kanga aroka bilemdangtsü tim. PWD department agibo Road & Bridges, Housing aser Mechanical ta asem kümer yimsü asür, saka lenmang aser apu repranger mali ! Agriculture department agia anasemka aküm saka tang tashi asenok 'relief' jang agi taküm alir. Kasaji Medical, Education, RD aser Power department amalatem, saka tokolak dang züin ashi tajangzük agütsüba kolok aser teka agibo kanga anüingdagi. Asenok ya kechisa repranger-a na ta bilema alidang, ano karbo ita sen ita asem manguba otsü angashir. Ya koda asütsü ? State agi mazük asü asenokang mazükmaru ?

OLEMSABANG

Nem Nemba Melangzür

Süpingnungsanger Longkümer, Darogapathar Dimapur

Opposition maliba limaji angatangra onsara tajung kechaser tebilemba ka, tangatetba ka, yimsüsür nükjitong ka, anungji Nagalima nung mezüingpubaji sasü anema alitsüla, Sasü anema alitsüji kong nungi adoktsü tesendaktep, tesendaktepji kechi nungi adoker mulung ajemba, mulung ajemba nungi kechi adoker. Alima tipmatemba reprangtsüla, kechaser tesendaktepji tamasa lenmang shidak yanglutsüla, Lenmang shidak yanglura destrict ajak nung mapa tajung kechisa yanglunüdir contractor tem aser supplier tem lenmang junga lira sen kangapo meindoki mapa tajung aika inyaktetsü. Electrical power line shidak lira Industries aser Agricultural mapa ajak jangratema inyaksü. Saka nüpurtem timtem marem nemnemba melangzür, Kibong nung tepo ka nükjitong shidak mekara senbo aateta penür arur saka ajak chimar ki mesütet ama lir. Saka ano külen reprangtangra nüpurtem nemnemer anungji Destrict nungi lenirtem dak temulung lema shimtetta yimsüsür dangi yokra par yangku tang sünger odaktsür. Mapa ka dak Rs.1 Crore aotsüla saka tenyartem nem Rs.1 lakh agütsüra tanüingbaji koloni aor? Nüpurtem nemnemba amajok. Aji agi tanü Naga lima ya state ajak dang nungi tamajungba. Khrista lima nung ya süngyanglu külemertemi jangratema amoshir saka oula (O) mali kechiaser Centre nungi Naga lima terenlok reprangi VIP aru nung state ajak rongnung Naga lima tematiba award anguba ya taktsü mapa lir. Naga lima atema Rs. 10 Crore angutsü ali nung 1 Core VIP nemji agütsüra teti arunütsü, Tanüingba senji kongi aor ? Kuliji Nüpuri yokba tishimtet lenir yangku nung aibaji lir.

Yakobi tebo, tüti aser Esau ashioktsü, aser Yakob chirtemi Yosef ashioktsü, aser külen parnok ajak taküm chiyongtsü pushia Ijipi alu, kechaser parnok tenük merem ajanga chiyongtsü asoshi tenu sen yong ayok. küm ishika lirpo Israel kinji Ijip lar aküm. Anungji timtem marem nünga ayimdenba oula Tsüngremi angashi saka Ijipi Tsüngrem sentong matizük nung sayatenya tapu ter agi merenshi mapang Ijip nungi adoktet. Saka lenmang nung timtem aika ajurua Israel nung Mosa anema mezüing temerem tzüyimküm nung nemnem aji Tsüngremi angashia Mosa tang kechiba kü tang asüingtanger (Tetezü tamang agi Ijip nung inyakba ama inyaksü ashiba) Tanapenpuba Tzüyim nungi adoker Shur linük anügo asem nung atongdang tzü maka nemnem dang ayong ka ajuru, saka tzü tako anungji nüpurtem nemnemba angashia Tsüngremi Mosa tang süngtong ka sayua ibaji ayong nungji inoktsü nung tzü tanang akümba dangji Mara ta aja. Ani 15: 22-24. Tasembenpuba, Aji sür külen Sin lise lima nung taya agi tasür lia Mosa aser Aron anema nemnem anungji Tsüngremi angashia Mosa tang shia anüing nungi Mana aser Opiya chiyongtsü tsükdaktsü. Yamaji iba nüpuri ozüing nung jajadi sü mejajalir ni tentangti. Ani 16:1- 4. Pezüpbenpuba, Aji sür külen parnok Refidm adong saka tzü mali nung Mosa anema nemnemba kibubai angashia Horeb nung nü jakdang Long manung ni nokdaktsü aser nai Long dakji zükang aser tzü adoka jemdakjang ta ashiba ama Mosai inyaka iba meta dangji Massa aser Meriba ta aja. Ani 17:1-6. Yamaji ano lenmang piyong Mosa aser Aron anema nemnemba Tsüngremi angashia Mosa tang ashi, ni Longma nungji nokdakdi nai teka mekanga ajok jagi Long dakji zükang ta ashibatem ya tim tang liasü ta angatetter. Kechaser lise lima nung chiyongtsü maka tzü maka anungji Tsüngremi Israel nung angatetta Mosa aser Aron ten jembijen jembia anidaktsüba angatetter saka nisung tang asünung Mosai Israel dak kanga jashia Long nungji anapen azükba Tsüngrem dak azüker ta mangatet iba ajanga Mosa aser Aron tenangzükba limai meyidaktsüba Laishiba ajanga asenok nem angatetdaktsür. Saka aji agi tena kotaki metutetsü ta mesayur.

Yimsüsürtem küm metsü (20) dak tema Naga lima, aser tongtipangsa asenok alashir ako joko angashisüogo nemnemba ya kecha masü nung nüpur menemnemmer. Telongpur sapisaru Naga nüpurtem dang memeshir ama saka shishilembar dang sarusajiba ajak nüburtem dak alipber, Ya tesünep masü. Nüpurtem kanga rishikangshira Nebukadnizar ama ataloker aser ataloktsü menua mali. Nübur tebilemba aser takinüba mataloktsüra Yimsüsürtem alizüing madongtsü. Nagalima ya Tsüngremi timtem aser lendong aika nungi soda ayur anungji Tsüngrem kanga tsüputi aser külemti.

(Alima asüktemer melangzür kechi akümstsü)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Uttar Pradesh nung Khristmas jakdang Khristan 6 jail nungji chioker



November 29, 2023 nü Uttar Pradesh kübok Sonbhadra district nung police-i apuba Khristantem noksa nung angur.

December 15, 2023: Khristmas atongtsü mapang ana nung lia Uttar Pradesh nung court kati Khristan trok jail nungji chiokogo.

Uttar Pradesh nung anti-conversion ozüing kübok November 29, 2023 nü Khristantemji pua liasü, ajisüaka tawa Sonbhadra district nung aliba court kati parnok nem bail agütsü.

Hindu right wing telok ka nung lenir kati Khristantem anema benokba ken o ka nung ajemdaker Khristan 42 anema ken o benok aser nisung 9 apu, aser parnok rongnungi parnok trok chioker.

Khristantem jagi mozü angati agüja tangartem Khristan yimsü dangi meyipdaksür, ta parnok nem tai tonglokja liasü.

Iba mapang nungji police-i Khristantem ket nungji Laishiba aser Khristan kakettek pua liasü.

Uttar Pradesh Prohibition of Unlawful Conversion of Religion Act 2021 ajanga tim masüba inyakyim ajanga tamangba yimsü meyipdaksütsü memelar, aser aibelenertem küm 10 tashi tepuokdak ayur aser senchi-a achir.

Sorkar atema jembitsür attorney katibo Khristan trok nem bail agütsüba anema nokdak, ajisüaka court-i bail agütsü.

Attorney jagi, Khristantemi tribal nütsüing teimba aliba district nung tiyazü tenangzükbatem aser taneptsüba agi mesüzüka Khristan yimsü dangi


meyipdaksür, anungji parnok nem bail magütsütsüla, ta metetdakja liasü.

Vishwa Hindu Parishad (World Hindu Council) nung office ketdangpur ka, Nar Singh-i par chirnurtem tuition agiba sen agütsütsü parnok dang mepishi saka parnoki magütsüba agi pai Khristantem anema inyak, ta Khristantemi metetdaksü.

December 15 nü osangbener den jembidang Khristan lenir kati, "Parnoki parnok kibongtem den külemi Khristmas amongtsü atema court-i parnok nem bail agütsüba atema onok pelar," ta metetdaksü.

"Inyakyim kar tembangba sülen anogo ka-ana tsüingda parnok jail nungji chioktsü," ta paisa shisem.

Taküm YouVersion nung kanga bulua azüingba Laiji Isaia 41:10 lir



December 15, 2023: 2023 küm YouVersion Bible app nung Khristantemi kanga bulua azüingba Laiji tekongji Isaia 41:10 liasü.

Taküm alima nung YouVersion app nung Lai azüingertemi kanga bulua azüingba aser tangar den lemsatepba Lai tekongji Isaia 41:10 liasü. Iba Lai nung yamai shia lir, "Anungji tetsübu, kechiyong Ni nü den lir; shisa tebulu, kechiyong Ni nü Tsüingrem lir. Ni na tashi itdaksütsü aser na yaritsü. Ni Kü teka tachichi agi na soitsü."

Tesüiba küm pezü tsüingda küm asem tashi Isaia 41:10 ya kanga nungtugutiba Lai liasü. 2021 küm nungtugutiba Laiji Mathi 6:33 liasü.

YouVersion app ya angati app ka lir; iba app ajanga Bible App, Bible App Lite aser Bible

App for Kids agütsür.

YouVersion tenzüksang aser CEO, Bobby Gruenewald-i, "Alima tsütsülen nungji bilemdangra tesüiba küm ishika asenoki timtem aika ajangshia arudar, anungji nisungtemi maneni Isaia 41:10 Lai nung nangzüka aliba teimla aser tesünep nung metalokba nungji kecha tesüingmangtsü mali," ta metetdaksü.

Bobby Gruenewald-isa, "Alima nung tetsübu aser tarendak jenti liaka, tamangji telangzüba lir ta asenoki amanger. Nisungtemi nüngdak mapang ajak nung maneni Tsüingrem aser Pa O dak metalokba ngua pelar," ta ashi.

YouVersion Bible app amshirtem aikati temeim, tesünep, taneptsüba, teimla aser tetsübu indang Lai otem bushir, ta parnoki sangdong ka

ajanga metetdaksü.

2023 küm YouVersion-i otsü tasen aika yanglutetogo, aser item rongnung tasen install asüba densema lir. Taküm device million 100 dak tema nung YouVersion Install süogo aser taküm iba app nung anogo shia Lai azünger shilem 20 agi teimba kümogo.

2022 küm den medemdangra taküm India nunga iba app install asüba shilem 53 agi teimba kümogo. India nung oshi 350 dak tema version 700 amshirtem lir.

Latin America nunga iba app install asüba shilem 107 agi teimba kümogo, Africa tesem kar nung iba app install asür shilem 98 agi teimba kümogo, Kenya nung shilem 225, Cameroon nung shilem 229 aser Uganda nung shilem 288 agi teimba kümogo.

Gruenewald-i, "Onok nükjidongji Tsüingrem O agi ajak ket atongtsü, tesem ajak ayimjemtsü aser anogo shia Lai züingdaksütsü atema lir. Onok kijaibo iba nükjidong matalokdaksütettsü. Tangbo alima tesem ajaklen Arogotemi longjemer Tsüingrem O proker. Onok den partners-i longjemer inyakba ajanga ano nisung aikati Tsüingrem anasa arutsü ta amanga pelar," ta metetdaksü.

ANOGO ABEN TSÜNGREM DEN

Tesendaktep

Yakob 3: 1-12

Yamaji temelia tenük-telen tila ka saka asüküm tulu jembir. Yakob 3:5

Kari anogo ka nung kijai ishiba agi oren 700 jembitsü mapang angur ta sükdanger. Sensak asema nung kanga O akari 100,000 oren 12,000 amshi jembir ta asatetter.

Anogo ka nung kati dang o tamajung paikaji jembira teraksa koda ka bena arutsü ! Saka ano temoatsüa koda ka! Ajakji oji koda amshir iba dak aket. Temeli mekümdangi amshiba ajanga teraksa bena aruaka, ibai timi amshira tajung aika inyaktettsü.

Tanü ne temeli koda amshitsü? Kibuba indang jembitsü tangar ajungshitsü aser Khrista asoshi kuli asütsü asü? Mesüra ibai tangar tai apuba nung miim sensaksem nung aser tangar o bendangba nung tendaksütsü mesüra amshitsü? Ghonda 24 mapang nung jembiba ajak bendener meyipa jembidaksü nung asenok aoksatsü asü ?

Anungji nai kechi jembir mita liang! Nai tebang lilia 100,000 otem jembir asü mesüra ajemajema o tajung 10,000 jembir. Temeli mekümdangi amshiba atema temulung meyipba Kibuba dang tatok meshiang aser Pai nai jembiba aser sensaksemba Pai azüokdakjang.

Kibuba, kü tebang otem Ne tsüing dang tagizüktettsü kümdakjang, kechiaser Na kü tashi aser ni alangzüksang lir; Yisu tenüing nung. Amen.

China linük nung Khristan nütsüing arenba kanga ajema kümogo

December 15, 2023: China 2010 küm China nung nung 1980s aser 1990s nung Protestant Khristan nütsüing Khristan nütsüing kanga arenba million 23 liasü aser tanübo China nung Khristan million 40 shi lir ta asadangteter.

China nung ketdangsertemi melaba Catholic Patriotic Association aser Three-Self Patriotic Movement nung register süa maliba "underground" mesüra "house churches" nung Khristan nütsüing kanga arener, ajisüaka sorkar ketdangsertemi item Arogotem anema inyakba manener.

Chinese General Social Survey (CGSS) data ajanga ashiba agi, 2010 küm nung 2018 küm tashi nung China nung tain nütsüing shilem 2-i dang parnok Khristan ta nangzüker, ta December 12, 2023 nü US nung amenoka aliba Pew Research Center-i metetdaksü.

China nung nütsüing billion 1.4 lir, ajisüaka China nung Khristan nütsüingbo million 28 dang lir (official data).

China nung Khristantemji shilem 90 bo Protestant Khristantem lir.

1960s nung Cultural Revolution mapang China nung yimsü nokdanga liasü, ajisüaka 1980s nung item tenokdangba agienba sülen Khristan nütsüing kanga aren.

1982 küm China nung Khristan nütsüing million 6 aliba nung 1997 küm nungbo Khristan nütsüing million 14 aküm, ta Pew Research ajanga metetdaksü.

China nung Khristan nütsüing kanga arenba million 23 liasü aser tanübo China nung Khristan million 40 shi lir ta asadangteter.

China nung ketdangsertemi melaba Catholic Patriotic Association aser Three-Self Patriotic Movement nung register süa maliba "underground" mesüra "house churches" nung Khristan nütsüing kanga arener, ajisüaka sorkar ketdangsertemi item Arogotem anema inyakba manener.

Xi Jinping China Tir akümba mapang nungji tenzüka pa leniba nung Chinese Communist Party (CCP)-i Khristantem anema tenokdangba ozüing aika benoker.

Aso 21buba nunga China nung Khristan nütsüing kanga renloker aser 2050 küm tashi nungbo nütsüing teimbaka Khristantem asütsü, ta journalists, shishirtem aser Khristian advocacy telok karibo asadangteterogo, ajisüaka Chinese General Social Survey (CGSS) data apibo linük nung Khristan nütsüing arenba anenadokogo.

2018 küm China Family Panel Studies survey ajanga bushitetba agi, China nung nütsüing shilem 3-ibo Khristan Tsüingrem dak amanger, ajisüaka linük nung nütsüing shilem 2 dang Khristantem lir.

**AO OSHI ANGAZÜKDAK:
TANÜ ANGAZÜKTSÜBA OJANG**



Tir Yimyim

Senzü

- (v) oli aruli ta jajaba (walk around)
- * Tsüraburtemi tanurtem anir yimti repranga senzü.

Sepai

- (n) tsükchir den rarar rogo (sepoy, soldier)
- * Sepai aika tongpang nung asür.

OLONG PAITEP # 6645

1		2			3	4		5
				6				
		7						
								8
	9							
10								11
			12		13			
			14					
15								16

TIPIEN

- 1. Nok agi shi alep - (5)
- 3. Yong agi atakba lempak - (5)
- 7. Aoksa reprang - (6)
- 8. Te ___ et - (3)
- 9. Ajuruner - (9)
- 10. Pentok lu - (3)
- 14. Lendong nungi jenbu - (6)
- 15. Temang junga aliba - (5)
- 16. Lokti menjendi - (5)

LANGTSÜNGLEN

- 1. Peria - (5)
- 2. Tai inyak - (7)
- 4. Teptsü - (4)
- 5. Kotak _____ - (6)
- 6. Asa ___ ang - (3)
- 8. Taruba küm - (7)
- 9. Yangi amener - (6)
- 11. Kibong yongsük - (5)
- 12. Kümsetta ao - (4)
- 13. Mesük - (3)

OLONG PAITEP # 6644 TELANGZÜBA

TIPIEN:

- 2. Pongsen, 5. Lepko, 7. Omen,
- 8. Maongka, 10. Yangkhu,
- 12. Senpong, 14. Angu, 15. Raksa,
- 16. Arameso,

LANGTSÜNGLEN:

- 1. Alimang, 2. Pongen, 3. Samaru,
- 4. Nün, 6. Pio, 9. Nüngdak,
- 10. Yongya, 11. Kongro, 13. Ora,
- 14. Ata.

NAI-A YA METETTER MA



Tetsü tebok nung aliba kinüi tanabuba 'trimester' mapang nungibo tetsübok nung natzü nadoker. Ajiser pai/laisa tanaben ibaji ajemer. Ano natzü nadoker aser ano ajemer, ta yamaji alimai maru tashi alir. I ba noksaji ka yangi angur.



Vigyan Bhawan, New Delhi nung National Energy Conservation Awards (NECA) 2023 agidang President Droupadi Murmu-i Meghalaya nem State Energy Efficiency Performance Award (Group 4) agütsüba angur. Iba sempet agizükba ajanga Meghalaya-i energy conservation aser efficiency atema bendanga agüja inyakba ajitetba sayur. Kümshia National Energy Conservation Day nung NECA ya agir.

ULFA pro-talk telok den peace accord sign asütsü: CM Sarma

Guwahati, December 15, 2023 (Agencies): United Liberation Front of Asom (ULFA) pro-talk faction den peace accord ka nung sign süteptsü alizüing lir ta Assam Chief Minister Himanta Biswa Sarma-i ashi. "Sorkari ULFA pro-talk faction den tan ita mesüra sangküm January tashi nung peace accord ka nung sign asütsü nükjidong lir. Iba accord nung sign sütepsü sülen Paresch Barua-i ULFA-Independent den olemtep tenzüksü merangtsü" ta CM Sarma-i ashi.

"Iba peace accord atema draft renemer alitsü imlar taküm küm tatemlen mesüra sangküm January tashi nung onoki sign sütepnür" ta pai ashi. Tesüiba anogo ishika tsüingda upper Assam nung grenade amshia amakba atema "ULFA-I commander-in-chief Paresch Barua-i anir züingsemtemi grenades pokdaksüba ajanga Assam renlokba menoktangtsü aser nisung shinga majangzüksü ta metettsüla" ta CM Sarma-isa ashi. "Paresch Barua-i anir nisung ajaki angatettsüla. Ozüing

alema inyaksangshiba ajanga Assam tesüleni anir alutsü. Grenades kar pokdaksüba ajanga Assam nüjiso mangutsü. Assam nung tensa melenshiogo aser tangalen nungi shishilembatsü arur anungji item tatalokba ajanga tetsüdaksü ajurutsü" ta paisa ashi. "Paresch Barua den jembitsü masü saka tenangzüktep ka agitsübaji tebilemtsü ka lir. Ni Paresch Barua den jembiogo aser asüing jembinüra jembitettsü. Ni Chief Minister akümba sülen nungi ni pa den aiben jembiogo" ta CM Sarma-isa shisem.

APSC Ex-Principal Controller Nanda police ket nungi chiok

Guwahati, December 15, 2023 (Agencies): Assam Public Service Commission (APSC) nung sen yong mapa yokdokba ken o dak sendakba nung taoba principal controller Nanda Babu Singh judicial custody nung ayur. December 11 nü Nanda Babu ya Silchar nung par kidang apu aser Assam Police

Special Investigation Team (SIT)-i anogo ananü asüingdangyaba sülen pa judicial custody nung lir. Tanü pa police ket nung ayutsü tatembang anogo liasü aser okadaki anir aru. Saka SIT-i pa parnok ket nung ayutsü masüingdang agi judicial custody-i belen. SIT-isa Karbi Anglong

district nung Superintendent of Taxes Wahida Begum dang asüingdangya südar. La ya anogo 14 nü judicial custody nung yua lir. November 29 nü Assistant Employment Officer Rakesh Das apuba sülen iba ken o bushisüingdangba maparen tuluba aküm aser APSC nung ochimashi tali puteta arur.

Manipur nung Assam arrtsü anasa aayangertem 2 kümzük



Guwahati, December 15, 2023 (TYO): Tamenglong district kübok Manipur-Assam arrtsü anasa sepaitemi aayanger ana kümzükogo. Assam-Manipur arrtsü anasa NH-37 nung mapa inyakba tesem ka nungi tena ya

Bodbarnü pur aoba liasü. Iba osang angashiba sülen Assam Rifles aser Manipur Police külem telok kati bushisüingdangtsü tenzük. Parnoki Lhangnom, Muktakhol, Tatbung, Lhangnom aser Phaitol nung construction

site tem semdanga senzü aser tesem balala mita ao. Iba temeket nung Civil Society Organisations (CSOs) aser yimtsüing lennirtemi yaritepsa ajanga Brihostibar anüingdang tena kümzükogo.

EU nung Ukraine züngsem akumtsü asoshi jembishinü tenzüksü

Brussels, Luchii/December 15 (Agencies): European Union lenirtemi Ukraine züngsem akumtsü asoshi jembishinü tenzüksü mulungtepba ya Ukraine aser Europe asoshi takok lir, ta Ukraine Tir Volodymyr Zelenskyy-i ashi, saka ghonda ishika lir Ukraine nem senotsü teyari agütsütsü aliba Hungary-i nokdanga liasü. European Council Tir Charles Michel-i iba senden ya Brussels nung ayongzük aser züngsem akumtsü asoshi jembishinütsü mulungtepba osang ya Brehostibarnü social media post ka nung lemsatepa

liasü. Zelenskyy-i iba telemtetba ya pelashishia agizük aser 'ibai Ukraine asoshi takok ka, Europe nung aliba ajunga asoshi takok ka, ajungmesoba, tashi itshiba takok ka lir,' ta X nung post asü. European Commission tekolak Ursula von den Leyenia ibai tongtipang telemtetba ka lir aser iba anogo ya asen union indang puti otsü nung teti alitsü ta ashi. "Item linük ya European kibong nung lir," ta German Chancellor Olaf Scholz-i ashi. EU-isa Moldova dena jembishinü tenzüksü mulung

aser Georgia nem EU candidate jenjang agütsü. Ajisüaka Kyiv nem senotsü teyari billion \$54 (50 billion euros) agütsütsü asoshi EU budget yanglushitsü benokba Russia Tir Vladimir Putin tembar tajung, Hungary Ato Kilonser Viktor Orban-i nokdangogo, ta Hokulbarnü sangdong. Hopta ishika Orban-i züngsem akumtsüba aser senotsü teyari agütsütsüba sentong ya nokdangtsü nangzük aru aser item ya Hungary mesüra EU tejangraba nung masü ta ashi. (Maneni tapak 8 nung...)

Iran police station amakdang sepai 11 asü

Rask, Luchii/December 15 (Agencies): Iran southeast tsütsü arütsü anasa aliba Sistan-Baluchestan province nung police station ka amakba lendong nung sepai 11 asü ta state television ajanga ashi. Iba province indang deputy governor Alireza Marhamati-i Hokulbarnü ashiba agi, linük yimtiba Tehran nungi mile 875 shi pilar Rask jila nung Hokulbarnep 2:00 ako meta iba lendong

atalokba nung senior police officers aser sepaitem asü. Iba sülen security forces den khatepba mapang lendong agütsür aika kaset, ta state television osang ajanga ashir. Afghanistan aser Pakistan den arütsüa aliba Iran nung sepaitem dak lendong agütsüba rongnung ibai tesashitaba ka lir. Iba lendong agütsüba ya Sunni telungpur Jaish al-Adl (Army of Justice) ajanga tenüng agiogo ta ashir. Jaish al-Adl ya 2012 nung tentet aser Iran-i kiralongrar telok ta

tenüng agüja lir. Temesepba mozü shibelenba telok balala, Baluchi minority aser Sunni Muslim hardliner aliba mechi Sistan-Baluchestan province ya kanga majung kumogo. Taoba mapanga iba ama lendong ya agüja liasü aser July ita nunga police pezü patrol nung lia tepset. Aji masüadang hopta ana tejaklen kasa province nung police ana aser lendong agütsür pezü tepset aser iba atema Jaish al-Adl yagi tenüng agia liasü. (Maneni tapak 8 nung...)

Gaza nung rara tesashiba akumer, US-i civilian kumzüksü ashir

Gaza, Luchii/December 15 (Agencies): Hokulbarnüa Gaza tesem ajungalen Israel sepaitem aser Hamas tsüngta kanga sashia khatepa Israel-i alilen nungi makyonga aoba nung tenokdangba ajurur aser US-i par tembar linük dang civilian tem asüba ajemtsü asoshi rara tasa melenshitsü ajungshir. Gaza north tsütsü Sheijaia, Sheikh Radwan, Zeitoun, Tuffah, aser Beit Hanoun, central Gaza nung aliba Maghazi anüdoklen aser ano south tsütsü Khan Younis yimitem nung raraba osang lir. Deir al-Balah, Khan Younis aser Rafah nung aliba mozüki tem nung Hokulbarnep nisung tasü mang aser yirur alirtem aiba bener aru. Rafah nung Israel nungeri tayimtsü amshia amakdang nisung pezü tepset aser iba Egypt den arütsü anasa yimti nung Israel nunger tank temia injang khaloktsür, ta medics aser nüburtemi ashir. (Maneni tapak 8 nung...)

Pakistan northwest tsütsü azüdokshiba manener

Tank, Luchii/December 15 (Agencies): Pakistan northwest tsütsü telungpur temi police station ka aser army outpost ka amakdang sepai kar asü aser kar yiru ta police-i ashir. Afghanistan den arütsülen taoba mapang Taliban telok tashi ita alidak azüdokshia tali kuma iba lendong ya Hokulbarnep ataloka liasü. Anogo asem tejakdang kasa Khyber Pakhtunkhwa province nung suicide bomber kati Pakistan nunger sepai 23 tepseta liasü. Hokulbarnep lendong ya Khyber Pakhtunkhwa province nung Dera Ismail Khan division kübok Tank district nung atalok. Sepai ana asü aser asem yiru, ta police-i ashi. Iba lendong agütsüra nisung asem asü, ta osang ka ajanga ashi. Police temi ana tepset aser ka pa

sasa pokseta asü ta ashir. Mapok aliba suicide jacket ka ngutet aser police temi operation tenzükogo. "Ozü sepaitemi ghonda ishika khatepa liasü aser police officer kar yur, ta police ketdangsür Iftikhar Shah-i osangbener dang ashi. Yangji aliba tanüngba police ketdangsürtem anizüker ogo aser yangji telungpur tali lir ta osang angazükba sülen search operation ka tenzükogo, ta Shah-i ashi. Ansar-ul-Islam ta sür telungpur telok kati iba lendong agütsüba tenüng agia Reuters osangbener dang sangdong ka nung ashi. Ajisüaka Dawn news nungbo Ansarul Jihad teloki tenüng agia liasü. Police temi item tenüng agiba ano mejangjatsü lir. (Maneni tapak 8 nung...)

MULUNGNEN O

ASO:
16th Oct. 1937



ASÜ:
4th Dec. 2023

Asür Nüngshichizüng Ozüküm (Mongsenyimti)



Sobaliba meraket tajung maitsüi ochi nung akang-akanga ameter tarutsü nükla benzüteta arutetba tebuti tajung, mapang tatsüka manemi lia arur iba akümüli tempangba anogo nungi tenzükta tang tashi shirnokisa nübu, rongsen, shisatsü aser sarasadem agi yaria aruogo, ajak dang kümremi pelaba iba zülü ajanga lemsateper. Nenok teyaritap tajung onoki kodanga mamatsü, asen Teyanglur Tsüngremi nenok kija kibongtem tali moajangma ta onok sarasadem.

~ Temeim Kinüngtsü aser Chirnungertem.

Office of the LONGMISA BAPTIST AROGO TENÜNGSANG AGÜTSÜR

Longmisa Baptist Arogo ajanga Rev. Senkachila Lemtur A/P (w) Dhipupar 'B' Ao Baptist Arogo Tsüngrem tenzükba wadang nung tabensaba kuma tenzüksü asoshi ano tali bendanga agüja 3rd Dec. 2023 anogo Dhipupar 'B' Ao Baptist Arogo nung ordained agiba asoshi tenüngsang tulu agütsür aser iba sentong renemtsüba asoshi Dhipupar 'B' Ao Baptist Arogo dang Longmisa Baptist Arogo ajanga pelaba lemsateper. Longmisa Laishir tetsür rongnung mezüngbuba ordained agiba asoshi Arogoi Tsüngrem nem tenüngsang agütsür aser ABAM-i nungloksüba ama iba sentong ordination council ajanga takok ngua renemtsüba asoshi tenzükertem dang pelaba lemsateper. Tsüngrem tenzükter kibong Pa yimli asoshi maneni moajang ta Arogo ajanga sarasademtsür.

Kibubar wadang nung;
Rev. T. Toshi Pastor **Mr. Senti Secy.**
Longmisa Baptist Arogo **Longmisa Baptist Arogo**

ALL INDIA SAINIK SCHOOLS ENTRANCE EXAMINATION (AISSEE)-2024 ATEMA ONLINE APPLICATION AGÜTSÜTSÜ ASOSHI ANOGO TATEM ASER TATIDANG ANOGO MELENSHIR

Dated: 16.12.2023

National examination tulu kar aser January 21, 2024 nü agütsü aliba All India Sainik Schools Entrance Examination (AISSEE)-2024 anogo tsüktepa mechi AISSEE-2024 ya linük tesem ajungalen 28.01.2024 (Deobarnü) agütsü lemtetogo.

Online application agütsütsü asoshi anogo-a 20.12.2023 tashi atsülangtsür.

Iba tatidang agütsütsü jangraba candidate temi Information Bulletin for AISSEE-2024 junga azüngtsü aser online ajanga <https://aissee.nta.ac.in> nung apply asütsü akok.

Activity	Last Date
Extension of last date for submission of online application form	20.12.2023 (upto 05:00 pm)
Last date for online Payment	20.12.2023 (upto 11:50 pm)
Correction Window	22.12.2023 to 24.12.2023
Date of Exam	28.01.2024 (Sunday)

Sd/
Senior Director, NTA

CBC 21354/12/0011/2324



Indian Oil Corporation Ltd.

MARKETING DIVISION



APPRENTICES ACT 1961 KÜBOK
APPRENTICES SHIMTSÜ SANGDONG

Indian Oil, Marketing Division ajanga States of India (Tamil Nadu & Puducherry, Karnataka, Kerala, Andhra Pradesh & Telangana, Maharashtra, Gujarat, Goa, Madhya Pradesh, Chhattisgarh, UT of Daman & Diu, UT of Dadra & Nagar Haveli, West Bengal, Odisha, Bihar, Jharkhand, Assam, Sikkim, UT of Andaman & Nicobar Island, Tripura, Nagaland, Mizoram, Meghalaya, Manipur & Arunachal Pradesh, Delhi, Haryana, Punjab, UT of Chandigarh, Himachal Pradesh, UT of J&K, UT of Ladakh, Uttar Pradesh, Rajasthan, Uttarakhand) nung apprentices 2091 shimtsü asoshi application meshir.


Iba Advertisement tapensa den eligibility criteria of age, qualification and details of stipend, relaxations, concessions, reservations amala onok indang corporate website www.iocl.com or at <https://iocl.com/apprenticeships> nung inokja lir.

Koma apply asütsü: Eligibility criteria tongteter jangra aliba candidate temi tekalen shia aliba website nung 16.12.2023@10:00 hrs nungi apply sütettsü. Online nung application agütsüba ya 05.01.2024@17:00 hrs tatem alitsü.

Iba sülen sangdong/temelenshi kar lira, itemji onok indang corporate website www.iocl.com nung dang metetdaksütsü.

Note: Apprentices nem regular employment agütsütsü Corporation-i menanzüktsü. Kodanga iba Apprenticeship nung ajemdaker Apprentices temi regular employment meshitsü tashi aser temeden mali. Iba Apprenticeship yagi Apprentice nem mapa agütsütsü atema IndianOil sentsü mali.

Advertisement No. IOCL/MKTG/APPR/2023-24



National Financial Reporting Authority

7th- 8th Floor, Hindustan Times House, 18-20 K.G. Marg,
New Delhi-110001

NFRA, vide Vacancy Circulars dated 23.11.2023 ajanga All India mesüra Central Civil Services nungi officers/ State Government & Union Territory Government indang officers/RBI officers/Public Sector Banks/Government Financial Institutions/Regulatory Bodies/danga Government Institutions nungi tsünglanglen agüja aliba post nung NFRA nung shimtsü atema applications meshir.

- i. Chief General Manager - (02 posts)
- ii. General Manager - (03 posts)
- iii. Deputy General Manager - (02 posts)
- iv. Assistant General Manager - (01 post)
- v. Manager - (02 posts)
- vi. Assistant Manager - (01 post)

Iba indang website www.nfra.gov.in nung agüja aliba ama deputation/ short-term contract basis nung alitsü. Jangra ser temsüa aliba officers temi Employment News nung iba advertisement adoker anogo 60 tsüngta tim lenmang ajanga apply asütsüla.

CBC 07122/12/0001/2324

SANGDONGER

Ni, Mr. Y. Takunuklu (Changtongya Yimsen) aser ozü chir Mr. Imotemjen. Pai ni ashi mangai nemzük nemponga lenmang ajak nung jajadang kü nem khuret tali bendentsür aser ni iba khuretji makoker. Anungji ni pa tanü nungi ozü chir masü ta sangdonger aser tarutsü nung kechi khuret arudir aruaka, ibaji kü khuret masütsü ta sangdonger.

Sd/-
Y. Takunuklu
Changtongya Town

Li Ning North East Invitational Badminton Tournament 2023 tembangogo



Mokokchung District Badminton Association-i ayongzüka Indoor Badminton Stadium Mokokchung nung Li Ning North East Invitational Badminton Tournament 2023 akaba nung takokertem, tetushi tejaoker Engineer in Chief, Dept. of Power, GoN Er.Moa Aier, DC Mkg., SP Mkg, NBA aser MDBA lenirtem külemi tangokba noksa nung angur.

Mokokchung, December/ Luchii 15, 2023 (TYO): Mokokchung District Badminton Association-i (MDBA) ayongzüka Indoor Badminton Stadium Mokokchung nung December 12 nungi tenzüka Nagaland Badminton Association akum kübok Li Ning North East Invitational Badminton Tournament 2023 akaba tanu kanga dang takoma nung tembangogo.

Tanu Li Ning North East Invitational Badminton Tournament 2023 iba tatembangbuba sentong nung tetushi tejaoker Engineer in Chief, Dept. of Power, GoN Er.Moa Aier liasü aser pai mapang tatsüka agia jembidang MDBA-i North East nungi badminton asayar adenshia badminton asaya toktepdaktsüsü ayongzüka asoshi tenungsang aguja ashi.

Er.Moa Aier-isa Mokokchung district ya mapang ka badminton asayar nungtoko aika adoka State nung category aika champion bona liasü aser tanu asayar aika adenshia iba

Li Ning tournament nung asayaba angudang kanga dang temelung chia reprangerta ashi. Mokokchung nung badminton asaya ano tali ajungkettsü asoshi MDBA-I shisatsü aguja yimstüing ajak nung badminton club kaka tenzükdakja itemji MDBA nung shimer tangar den toktepdaktsüsü lenmang bushitsüлата ashi.

Kasa sentong nung Tournament Referee Imomar ajanga tournament nung ataloka arubatem lemsatöp aser Tia Mollier NBA Executive ajanga iba Li Ning tournament akaba nung reprangtetbatem lemsatöp aser Organising Committee Convenor I.Lipokonen Jamir-i tepela o jembiba den sentong nung Tsüingrem lenisüba jazüka Dr.Lanu Walling-i sarasadem aser Dr.Limasenla Jamir ketdangsüba nung iba sentong agi.

Li Ning North East Invitational Badminton Tournament 2023 category balala nung takok angurtem yamai liasü.

- 1. Men's Doubles 105+ Winner: Bijoy Kumar

Barman & Yumnam Tombisana Singh (Assam)

Runner-up: I. Temjen & Sashiwapang (Nagaland)

2. Men's Doubles 95+ Winner: Bendangnochet & Er. Imlisunep (Nagaland)

Runner-up: Temsuyanger Lemtur & Sashiwapang (Nagaland)

3. Men's Doubles 85+ Winner: Bendangnochet & Er. Imlisunep (Nagaland)

Runner-up: Er. Toshikaba & Sendongyanger(Nagaland)

4. Men's Doubles 75+ Winner: Sendongyanger & Wapang Tzudir (Nagaland)

Runner-up: Supongtemsu Longchar & Tiayanger (Nagaland)

5. Men's Doubles Winner: Teichang Herie & Peramrisi Zeliang (Nagaland)

Runner-up : Unil Kumar (Manipur) and Hitlo V. Sumi (Nagaland)

6. Women's Doubles Winner: Shekhotolu Puro & Tovali Shohe (Nagaland)

Runner-up: Ekumyala Changkiri & Bendangnaro Jamir(Nagaland)

Longleng nung 11th Women Volleyball Tournament temogo



Dimapur, Luchii/December 15 (TYO): Longleng nung 11th Women Volleyball Tournament tembangba sentong December 14, 2023 nü agia liasü.

Iba asayamung nung final match ya Women Veteran Club aser Agri Ward Youth tsüingta asaya aser Women Veteran Club-i takok angu.

Iba sentong nung tajungshi o jembidang taoba PA to DC Longleng, Bhamak-i tetsür temi saisapong aser danga wadang

nung takok anguba otsü kar shia liasü.

Tawa Olympics nung medal tally ajanga linük asoshi teburtem dang nungi tetsürtemi medal timba bener aruba sayur, ta pai ashi.

Tejakleni aotsü aser pei mangdang atalokba nung kecha nema mesoitdaktsüsüla, ta pai ashi aser loktiliba nunga tetsürtem nema teburtem den kasa maongka agütsüsüla, ta ashi.

Deputy Commissioner aser

Chairman, BBBP Longleng, Dharam Raj, IAS ajanga takoker nem trophy agüja liasü.

11th Women Volleyball Tournament ya District Administration aser Beti Bachao, Beti Padhao (BBBP) Scheme kübok District Hub for Empowerment of Women Longleng ajanga Phenei Soti Clubunder den lungjemer "Celebrating Womenhood Through Sports" omen nung ajemdaker ayongzüka liasü.

BENDANGLI OSANG (Tapak 7 nungi...)

EU nung Ukraine züngsem akumtsü asoshi...

Züngsem kumdaaktsüsü asoshi jembishinütsü atema vote agitepba takdang nung Orban-i madentsü mulung, saka Michel-i budget proposal benokba nung pai anema nokdakba danga EU linüktemi mokoktet.

Rule of law tebilemstü mechi sen euro billion aika Brussels-i soita aliba mesala tashi senotsü teyari agütsüsü memelatsü aser Ukraine züngsem akumtsü jembiba anendaktsüsü, ta Orban-i Hungary nung dang Hokulbarnü state radio sensaksem ka ajanga shia liasü. Orban ya Putin den tembar

tajung asüba kisüing agi masü saka sen 30 billion euros (\$32.8bn) dak tema Brussels-i soita aliba mechi EU-i Ukraine yaritsü merangba nung tetsükdaktsü agütsür südi ta amanger.

"Iba Hungary tebilemstü masü. Meilongi asenoki soita yutettsü aser nüngdakra asenoki anendaktsüsü, aser telemtetba tatemangba ya Hungarian parliament-i agitsü," ta Orban-i ashi.

Ukraine yaritsü asoshi EU nung budget benokba Hungary-i nokdangba atema Russia-i tenüngsang agüja liasü.

Iran police station amakdang sepai 11 asü

May ita Sistan-Baluchestan province yimtiba Zahedan southeast tsütsü Saravan nung telungpur den khatpepdang Iranian border guards pongu asü.

Iba lendong ya kiralongrar telok kati agütsü aser parnok ya linük telungi aittsü meranga aliba züngsemtem yiruba ajanga jena ao ta state media ajanga shia liasü.

Taliban sepaitemi Sistan-Baluchestan nung aliba Iranian police station ka nung injang khaloktsü, ta police tanishir Qassem Rezaee-i May ita

tatemlen ashi. Tzü mechi Iran aser Afghanistan mangatetep nung lir.

Shia Iran nung timba aliba Zahedan yimti nunga police ketdangsür kati tetsürchanu ka dak tashiyim amshia shi nung medem ta tai tonglokja taoba küm September ita nungi mapang talangka longkak aita aru.

Jaish al-Adl aser parnok den sendaktepa aliba teloktem Pakistan nungi arütsü alema aita Iran sepaitem dak lendong agütsür ta tai tonglokja arur.

Pakistan northwest tsütsü azüdokshiba manener

Hokulbarne military post ka amak aser iba mapang sepai ana asü aser pongu yiru, ta yangji aliba police ketdangsür Salim Khan-i ashi.

Mongulbarnü telungpur telok ka Dera Ismail Khan yimti nungi mile 37 shi pilar Daraban jila nung military post ka telungi ai. Telungpur ya bomb bona aliba gari ka nung mener arua police station gate nung atsük aser iba sülen takum bendanga agütsür bomb pokdaktsü, ta army temi ashir.

Iba lendong ya tawa tentetba Tehreek-e-Jihad Pakistani

telungpur teloki tenüing agiogo, koba Tehreek-e-Taliban Pakistan (TTP) mesüra Pakistani Taliban nungi razüka aoba südi ta amanger.

Taküm Khyber Pakhtunkhwa province nung azüdokshi lendong tali ataloker. January ita iba province yimtiba Peshawar nung suicide bomber kati mosque ka nung tenük yoker bomb pokdaktsüba mapang nisung 101 asü.

Küm aika TTP yagi Pakistan sorkar den rara arur aser parnoki sorkar atsüingdoker Islamic yimsü tesashiba amshiner.

Gaza nung rara tesashiba akumer,...

Israel mitkar temi Hokulbarnü sangdong ka nung ashiba agi, par sepaitemi Gaza City kübok Sheijaia district nung Hamas command ka aser control hub ka raksatsü, Khan Younis nung 'targeted raid' ka agi, aser Rafah area nung tesem kar nung bomb pokloktsü, kong Hamas temi hadir shibelenia liasü.

Israel-i ita ana anüinglen aser alilen nungi Gaza amakba ajanga Hamas telok tashi lula asü masü ta tasüingdangba ka arur.

Israel-i tanen makai ita ana bomb pokloktsüba ajanga tzükum anasa aliba alinük tilaka ya jana amai kumtsüogo aser nisung 19,000 jungnüa asüba jangjar ano meyrirjang aika ki o

jen teraksa agi nembang lir südi ta Palestinian health ketdangsür temi ashir.

Hamas teloki October 7 nü arütsü alema oa Israel nung nisung 1,200 tepsetba den külemi nisung 240 pua bener aoba tayang kupzüka Israel-i Gaza amaker, kong Iran-i yariba Hamas teloko yimsü asür.

Israel Ato Kilonser Benjamin Netanyahu-i US National Security Adviser Jake Sullivan dang takok mangu tashi Israel-i Hamas den raratsü, ta Brehostibarnü shia liasü. Ita ishika agitsü akok, saka asenoki akoktsü aser asenoki parnok samatsüsü, ta Israel Defence Minister Yoav Gallant-i ashi.

BILEMDANGANG
 "Takum nung jangratemtsü tulutibaji temeim."